

Aalisarnermut Piniarnermullu
Naalackersuisoqarfik
Imaneq 1A, 701
Postboks 269
3900 Nuuk

BankNordik
Oknarvegur 5
Postboks 3048
FO-100 Tórshavn
Reg. nr. 10

Telefon +298 330 330
info@banknordik.fo
www.banknordik.fo

E-mailikkut uunga nassiunneqarpoq: APN@nanoq.gl
cc uunga: jepa@nanoq.gl aamma thra@nanoq.gl

Januaarip 22-at 2024

Tusarniaanermi akissut: Aalisarneq pillugu Inatsisartut inatsisissaattut siunnersuut – Suliap nr.: 2023-3503

BankNordikip inatsisissatut siunnersuut qulaani pineqartoq tusarniaanermi tigusimavaa, siunnersuummut oqaaseqaatai ataani allassimapput.

Siunnersuummi § 11, imm. 4

Aalajangersakkami pineqartumi aalajangiunneqartoq ima oqaasertaqarpoq: *“Aningaasat akiligassaqarfinit pissarsiariniarneqareernerisa malitsigisaanik angallat imaluunniit pisassanit pigisat, tak. § 29, tunniunneqarsimappata § 9, imm. 2 aamma imm. 3- mi piumasaqaatiniit immikkut akuersinermik Naalackersuisut nalunaaruteqarsinnaapput.”* (uagut ataatigut titarparput).

BankNordikimut aningaaserivinnullu allanut assut pingaaruteqarpoq taarsigassarsiasanik akuersinermi piumasaqaatit atuuttussaataitasut ilisimariissallugit, aammalu siunissami piginnittoq akiitsugaqarpallaarluni pinngitsaaliissummik nuisitsisoqassagaluarpat qularnaveeqqusiinermik tigusinissamut periarfissat suussanersut ilisimassallugit.

Taamaammatt innersuussutigaarput aalajangersagaq erseqqissarneqassasoq, inatsimmilu ersarissumik takutinneqassasoq qularnaveeqqusiilluni taarsigassiisartuugaanni qularnaveeqqusiussaq tigusimagaanni allamullu ingerlateqqillugu tuniniarnera ajornakusuussagaluarpat immikkut akuersinermik ass. qaammatit 12-it tungaanut sivisussuseqartumik pisinnaatitaassasoq, immikkullu akuerineqarneq sivitsorneqarsinnaassasoq.

Erseqqissaaneq taamaattoq BankNordikimut immikkut ittumik pingaaruteqassaaq, pissutigalugu piumasaqaat § 9, imm. 3, nr. 2-mi piumasaqaatigineqartoq bankip naammassisinnaanngimmagu. Tassa imaappoq naak banki Kalaallit Nunaannut aalajangersimasumik attuumassuteqaraluartoq, Nuummi adresseqarluni, “kalaallisut” CVR-nr.-qartut CVR-inik nalunaarsuiffimmi nalunaarsorsimalluni, Kalaallit Nunaannilu suliaminut atatillugu tamakkiisumik akileraartartussaataagalarluni, bankimut aningaasaleeqataassutinik piginnittut piumasaqaatit imm. 2, nr. 1 – 3-mi allassimasut naammassisinnaannginnamikkit, aktiat NASDAQ COPENHAGEN-imi nalunaarsorsimmammata aktianillu piginnittut nunarsuaq tamakkerlugu siaruarsimallutik.

Siunnersuummi § 23

Aalajangersakkami pineqartumi aalajangiunneqartoq ima oqaasertaqarpoq: *“Aalisariutit pisaqarsinnaassusaat pisaqarsinnaasunut nalimassarneqarnissaat ilaatigut siunertaralugu akuersissutit atulersinneqarnerat attatiinnarneqartarnerallu piumasaqaatillu taakkununga atasut pillugit Naalackersuisut malittarisassiorsinnaapput.”*

Naalackersuisut piginnaatitaanerata uani pineqartoq assorsuaq siammassippasippoq, piginnaatitaaneratali qanoq timitalerlugu atorneqarnissaa inatsisissatut siunnersuummi oqaaseqaatitaaniluunniit sumiluunniit erseqqissarneqarani, aammalu §§ 33 aamma 34-mut qanoq atassuserneqarsinnaanera erseqqissarneqarsimanani.

Aalajangersagaq una pisassiissutigineqarsimasunik taamaatitsinissamut periarfissatut allatut isigineqassava, imaluunniit §§ 33-mi 34-milu killiliussanit killilernerqarpa? Massakkut qanoq allassimanera aallaavigaanni §§ 33 aamma 34 avaqqullugit pisassiissutigineqarsimasunik taamaatitsinissamut periarfissatut paasineqarsinnaavoq, taamaammallu inuussutissarsiornissap nalorninaatitaa annertunerussalluni, taassumalu malittaani aningaaseriviit aalisariutinut aningaasaliinissamut piumassusaat annikillisussaalluni.

Siunnersuummi § 33, imm. 1

Aalajangersakkami tamatumani aalajangiunneqarpoq piffissaq pisassiissutinik piginniffiusoq akuersissutigineqartoq minnerpaamik ukiunik 10-nik sivilissuseqassasoq (taamaattorli Kalaallit Nunaata Kitaani saattuarniarnermi ukiunik 5-nik).

Umiarsuarmik pisinermi aningaasalersorneqarnerata ukiunik 10-nik atuuffeqarnissaa nalinginnaanngitsorujussuuvoq, taamaammallu naatsorsuutigineqarsinnaavoq piffissaq pisassiissutinik piffissaliussaq taama sivikitsigimmat aalisarnermik ingerlatsisussat nutaat aningaasalersuisussanik pissarsiorniarnerat ajornakusoornersussasoq. Tamanna naatsorsuutigineqarsinnaavoq naak aalajangersakkat malillugit oqaatigineqaraluartoq “piffissat ingerlaavartuusut” ukiut tamaasa ukiunut 10-nut sivitsorneqartarlutik (taamaattorli Kalaallit Nunaata Kitaani saattuarniarnermi ukiunik 5-nut).

Umiarsuarmik pisinermi aningaasalersorneqarnermut atatillugu nalinginnaanerpaavoq ukiut 15-it missaannik sivilissuseqartarnera, taamaammatt piffissaq pisassiissutinik piginniffiusoq ukiunik 15-inik sivilissuseqartartuuppat aalisarnermik ingerlataqartut nutaat aningaasalersorneqarnissamut periarfissaat annertunerujussuussagaluarput.

Inussiarnersumik inuulluaqqusilluta

BankNordik